

**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXV Blg. 17  
Setyembre 7, 2004  
[www.philippinerevolution.org](http://www.philippinerevolution.org)

*Editorial*

## Labanan ang dagdag na pasanin sa mamamayan

**M**arapat at labis na kinakailangang paigtingin ng sambayanang Pilipino ang kanilang militanteng pakikibaka upang labanan ang plano ng rehimeng US-Arroyo na pagpapataw ng mga karagdagang pasanin sa mamamayan. Ito ang tangi nilang sandata upang labanan ang walang habas na mga atake ng reaksyunaryong estado

laban sa kanilang kabuhayan.


Ang kasalukuyang pagsidhi ng krisis sa ekonomya at pananalapi ng estado ay patunay ng patuloy na pagkabulok ng sistemang malakolonyal at malapyudal. Walang habas na dinadambong ng malalaking dayuhang kapitalista ang yaman ng bansa. Bunsod nito, ang ekonomya ng bansa ay atrasado, agraryo at di industriyalisado. Permanente itong nakalug-

mok sa krisis.

Dahil walang lokal na produksyong nakatatayo sa sarili, permanenteng tagibang ang dayuhang kalakalan. Walang awat na hinuhuthot ng mga dayuhang malaking kapitalista ang kanilang tubo at walang tigil ang burukratang kapitalistang pagnanakaw sa kabangbayan. Palagiang umiiral ang suliranin ng pananalapi ng estado at ng lokal na ekonomya. Pana-panahon itong sumasambulat tuwing hindi sumasapat ang panawid-pondong nagmumula sa mga pautang ng mga imperyalistang bangko at mga institusyong pampinansya.

Ang kasalukuyang tampok na problema ng masidhihing kakulangan sa pondo ng estado ay karugtong ng krisis pampinansyang sumakal sa ekonomya ng Pilipinas noong 1997. Sa halip na iwasto ang mga patakaran ng liberalisasyon ng kalakalan at pamumuhunan na nagresulta sa krisis ng 1997, ang mga ito ay ipinagpatuloy at lalo pang pinasaklaw ng rehimeng Arroyo.

Ang nakaambang pagsambulat



***Mga tampok sa isyung ito...***

**Agresibong palawakin ang kilusang manggagawa!**

PAHINA 3

**Kalagayan ng karapatang-tao sa bansa**

PAHINA 7

**Lumalalang panggigipit sa midya**

PAHINA 10

ng krisis ng pananalapi ng naghaharing estado ay tuwirang resulta ng mga sumusunod na pangunahing salik:

(a) ang walang kontrol na pagbabayad sa mga maanomalya at di pinakinabangang mga utang panlabas. Aabot na sa mahigit 60% ng badyet ng reaksyunaryong gubyrno ang nakalaan para rito;

(b) ang patakaran na ilibre sa buwis ang mga dayuhang mamuhunan at ibigay sa kanila ang kalayaang iuwi ang kahit 100% ng kanilang tubo at ipinuhunan;

(k) ang pagkalugmok ng lokal na produksyon, sa partikular, ng lokal na manupaktura;

(d) ang palalang korapsyon, laluna ng mga burukratang kapitalista, na nakikipagsabwatan sa malalaking negosyante upang makalusot sa pagbabayad ng karampatang buwis.

Ang mamamayang Pilipino ang pangunahing nagdurusa sa labis na kakulangan sa pananalapi ng estado. Habang tinitiyak ng naghaharing estado na makapaglaan ng pondong pambayad sa mga maanomalya at walang kapakinabangang utang panlabas, patuloy

namang nangangabulok ang mga serbisyong pangkalusugan at edukasyon, maging ang iba pang kinakailangang imprastruktura, dahil sa labis na kakulangan sa pondo.

### Mga huwad na solusyon ni Arroyo

Ang pag-iingay at pananakot ng rehimeng Arroyo at mga burgis na ekonomista tungkol sa posibleng pagsambulat ng “fiscal crisis” sa darating na dalawa hanggang tatlong taon ay pawang pagkukundisyon sa opinyong publiko para lunukin ang mga lasong inirereseta ng imperyalismo sa Pilipinas.


Desperado ang rehimeng Arroyo na ipataw ang mga karagdagang buwis sa mamamayang Pilipino upang makapagpalitaw ng mahigit P80 bilyong dagdag na pondo para sa gubyrno. Pilit na pilit ang paglalarawan nito ng “diwa ng bayanihan” para ipatanggap sa mamamayang baon na sa kahirapan ang mga karagdagan pang pasaning buwis.

Ang lahat ng hakbanging ito ay hindi makalulutas sa krisis sa

pananalapi ng estado. Makapagpalitaw man ito ng karagdagang kita—kapalit ng labis na pagpapahirap sa mamamayan—hindi nito lulutasin ang mga tunay na dahilan sa likod ng pasidhi nang pasidhing suliranin sa pananalapi.

Wala sa katayuan si Gloria Arroyo na bigyang-solusyon ang suliranin sa pananalapi ng estado. Ito’y sa sumusunod na mga kadahilanan: Una, si Arroyo ay tapat na disipulo ng imperyalismo. Hindi siya kailanman magsasagawa ng hakbanging talibas sa mga patakarang ipinapataw ng imperyalismo sa Pilipinas. Ikalawa, ang gubyrno ni Arroyo ay gubyrno ng walang kabusugang mga magnanakaw. Sa kabila ng pag-iingay ni Arroyo na aalisin na ang “pork barrel” ng mga kongresman, hindi naman ginagalaw ni Arroyo ang P1 bilyon badyet sa “intelligence” at *special discretionary fund* ng kanyang upisina. Laganap ang pagdududa ng mamamayan maging sa tinatawag na “bayanihan fund” na nilikom mula sa boluntaryong kontribusyon ng mga pulitiko at malalaking negosyante.

Kung mayroon mang idudulot ang mga hakbangin ni Arroyo, ito’y dagdag na pahirap sa mamamayan—mga karagdagang buwis at kaakibat nitong pagtataas sa presyo ng kuryente, tubig at iba pang mga serbisyo at bilihin. Maging ang sinasabing “pagtitiptip” ay sa mamamayan pangunahing ipinapapasan sa anyo ng balak na pagbabawas sa badyet sa mga serbisyong pangkalusugan at edukasyon. Samantala, habang nananawagan ng pagtitiptip, buong kapal naman ng mukha na ipinagpapatuloy ni Arroyo at ng mga tauhan niya ang magarbong estilo ng pamumuhay—mga sunud-sunod na byahe sa labas ng bansa, paggamit ng mamahalin at magastos na sasakyan at iba pa.

 <p>Taon XXXV Blg. 1 Setyembre 7, 2004</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p><a href="http://www.philippinerevolution.org">www.philippinerevolution.org</a></p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa:</p> <p><a href="mailto:angbayan@yahoo.com">angbayan@yahoo.com</a></p>	
<p><b>Nilalaman</b></p>	
<p><b>Editorial:</b> Labanan ang dagdag na pasanin ng mamamayan</p>	1
<p>Agresibong palawakin ang kilusang manggagawa</p>	3
<p>Labanan ang AJ, ituloy ang welga</p>	4
<p>Pag-ugat ng Partido sa mga manggagawa</p>	6
<p>Kalagayan ng karapatang-tao</p>	7
<p>Panggigipit sa midya</p>	10
<p>Balita</p>	12
<p>Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	

## Paigtingin ang sama-samang paglaban ng mamamayan

Kailangang maglunsad ng maiigting na pakikibaka ang mamamayang Pilipino upang salagin ang mga atake ng rehimeng Arroyo sa kanilang kabuhayan. Tanging sa pamamagitan ng sama-samang paglaban mapipigilan ang lalo pang pagdausdos ng kabuhayan ng mamamayan.

Sa kasalukuyang kalagayan, tungkulin ng mga rebolusyonaryong pwersa na mamuno sa mga pakikibakang bayan laban sa pagtataas sa presyo ng mga produktong petrolyo, singil sa kuryente at tubig at sa mga serbisyong pangkalusugan at pang-edukasyon. Ang pakikibaka para sa karagdagang sahod para sa mga manggagawa at kawani ay labis na kinakailangang isulong at paigtingin sa buong bansa.

Kailangang tipunin ng mga rebolusyonaryong pwersa sa iba't ibang paraan ang napakalawak na galit ng mamamayan at iluwal ito sa malalawak na demonstrasyon sa lansangan. Sa harap ng pagmamati-gas ng rehimeng Arroyo, tanging ang malalawak na demonstrasyon ng ilampung libong mamamayan ang makapipigil sa pagpapataw ng dagdag pang mga pahirap sa mamamayan.

Ang pagsidhi ng krisis sa ekonomya ay naglalandad sa kabulukan ng kasalukuyang naghaharing sistema. Napakalinaw nitong ipinakikita ang pangangailangang wakasan ito upang mabigyang-daan ang pagtatayo ng isang bago, masigla at maunlad na rebolusyonaryong kaayusan.

Tungkulin ng mga rebolusyonaryong pwersa na ilinaw sa mamamayan na tanging ang rebolusyonaryong pagbabago ng lipunang Pilipino ang makapaghahatid ng permanenteng solusyon sa palagiang krisis na kinasasadlakan ng sambayanang Pilipino. AB

# Agresibong palawakin ang kilusang manggagawa!

**H**abang patuloy ang paglubog ng ekonomya sa walang katapusang krisis, lalong lumalaki ang pangangailangan para sa malakas at malawak na kilusang masa upang salagin ang epekto nito sa mamamayan. Sa kalunsuran, susi rito ang paglawak ng militanteng kilusang manggagawa at kanilang mga unyon. Paborable sa pagmumulat at pagpapakilos ng milyun-milyong manggagawa ang kasalukuyang krisis pang-ekonomya. Ngunit dala rin nito ang malawakang tanggapan, pagsasara ng mga pabrika at pagkabuwag ng mga nakatayo at naitatayong mga unyon. Kung kaya't hindi lamang mahalaga ang pagpaparami ng mga militanteng unyon, kailangang agresibo at mabilis itong isagawa upang tugunan ang mga hamon ng panahon.

Halos 10% lamang sa 36 milyong manggagawa ang mayroong unyon.

Napakaliit na porsyento lamang sa mga unyong ito ang mayroong mga *collective bargaining agreement* at mas maliit pa ang maituturing na bahagi ng militanteng kilusang unyon.

Sa ilalim ng makapitalista at mapaniil na batas paggawa ng bansa, napakahirap magbuo ng unyon. Naparaming ipinapataw na ligal na rekisito na dapat munang tugunan at napakabagal ng proseso ng pagpaparehistro sa Department of Labor and Employment (DOLE). Maaaring umabot sa dalawa hanggang tatlong taon ang proseso bago maging lehitimo ang unyon. Upang kilalanin at makipagtawaran dito ang kapitalista, dadaan muli sa butas ng karayom ang unyon.

Mas masahol pa, maraming nakatayo at katatayo pa lamang na mga unyon ang napahihina, kundiman agad na nabubuwag oras na makipagtunggali ang mga ito sa mga kapitalista. Gamit ang mga mapaniil na batas at taktika, katulad ng pag-uutos ng *assumption of*



*jurisdiction* (AJ), dinudurog at tinitiyak ng mga kapitalista, katuwang ang DOLE na hindi na makababangon ang mga militanteng unyon.

Gayunpaman, ang lahat ng ito ay hindi dapat sumagka sa agresibong pagpapalawak ng militanteng kilusang unyon. Mahaba na ang karanasan ng kilusang manggagawa sa hakbang-hakbang na pagtatayo ng unyon kahit sa pinakagipit na kalagayan at sa kabilang ng pinakamahigpit na mga batas.

Marami nang tagumpay ang kilusang paggawa na kailangang gamiting tuntungan upang pasaklawin at pabilisin ang proseso ng pag-oorganisa sa mga manggagawa. Nariyan ang mga militanteng pederasyon at sentro ng paggawa na marapat gamitin upang abutin ang maraming pabrika at engklabong hindi pa kailanman natayuan ng unyon. Kailangang pahigpitin ang pagtutulungan ng mga pambansang sentro sa mga rehiyunal na pormasyon upang ibayong itulak ang pagpapalawak at pagpapatatag ng militanteng unyonismo laluna sa pinakamalalaking lunsod ng bansa.

Maaaring gumamit ng iba-iba o kumbinasyon ng mga pamamaraan at taktika upang maitayo ang isang unyon sa pinakamabilis na paraan. Bilang panimula, maaaring itayo ang mga asosasyon at organisasyong masa upang maabot ang pinakamalawak na bilang ng mga manggagawa. Pinakaepektibo ito sa mga pabrika at engklabong napakahigpit ng patakaran laban sa pag-uunyon.

Magsisilbing katuwang ng mga unyon ang mga organisasyong ito sa pakikipaglaban para sa kagalingan at mga karapatan ng mga manggagawa sa loob at labas ng pabrika. Magsisilbi rin ang mga ito bilang malalim na balon ng mga militanteng lider-union at kasapi.

Maluwag na makapagsasagawa ng mga pagkilos ang mga organisasyong ito sa loob at labas ng pabrika upang makapagpalawak at makapagpatatag. Liban sa pagwewelga, maaaring maglunsad ang mga ito ng mga aksyong protesta at iba pang uri ng mga sama-samang pagkilos upang igiit ang mga isyung pang-union kahit hindi pa nakatayo ang unyon.


Kahit naitayo na ang mga unyon, maaaring patuloy na isulong ng mga organisasyong ito ang iba't ibang isyu ng mga manggagawa. Ang suporta nito ay lalong nakapagpapalakas sa unyon.

AB

## Labanan ang AJ, ituloy ang welga

*Nang magwelga ang mga manggagawa ng REN Transport Corporation noong nakaraang Hulyo, agad na naglabas ng kautusan para sa "assumption of jurisdiction" o AJ Order ang Department of Labor and Employment (DOLE). Sa pamamagitan AJ Order, epektibong naipatigil ng DOLE ang welga at naipabalik sa trabaho ang lahat ng mga manggagawang nakawelga. Ayon sa reaksyunaryong batas, ipapailalim lamang ang isang welga sa DOLE kung may panganib na makaaapekto ito sa "pambansang interes". Ang REN Transport ay*

*isang kumpanyang nangungulekta ng basura sa Metro Manila. Hindi maipaliwanag ng DOLE kung paano nailalagay sa panganib ang pambansang interes kung may ilang araw na hindi magroronda ang mga trak ng basura.*



**I**sa sa pinakapalask at arbitraryong taktika ng reaksyunaryong estado laban sa mga manggagawa ang AJ. Nagsisilbi itong pangil ng rehimen upang labanan at durugin ang militanteng unyonismo sa bansa. Sa dami na ng ipinapataw na AJ at bilis ng pagpoproseso nito, hindi kataka-taka na bansagang "Reyna ng AJ" si Patricia Sto. Tomas, kalihim ng DOLE.

Sa kabila ng mahigit 382 unyon na nagsampa ng *notice of strike* (NOS) mula Enero hanggang Hulyo sa taong ito, 15 lamang ang aktwal na nakapagtayo ng piketlayn. Dalawampu't tatlo sa 382 NOS ay ipinailalim sa AJ bago pa man naitayo ang piketlayn. Labinlima ang ipinailalim sa *compulsory arbitration*. Dalawa naman sa aktwal na nagwelga ang ipinailalim sa AJ. Samantala, aabot sa 386 kaso ng namumuong welga ang awtomatikong ipinailalim sa *preventive mediation*. Sa mga kasong ito, hindi na umabot sa paghahapag man lamang ng NOS ang mga manggagawa.

Ipinangangalandakan ng DOLE na bumaba na ang bilang ng mga aktwal na welga at *lock-out* kumpara sa nakaraang mga taon. Itinatago ng estadistikang ito ang napakaraming

welgang hindi natuloy dahil sa panimulang bahagi pa lamang ay ipinapailalim na sa AJ o di kaya'y sa *preventive mediation*.

Halos awtomatikong ipinapataw ang AJ sa anumang welga laban sa malalaking dayuhan at lokal na kumpanya at maging sa maliliit na korporasyon kung ang may-ari ay pulitiko o kasosyo ng pulitiko. Nitong Agosto, ipinailalim sa AJ ang welga sa Hacienda Luisita Incorporated at Sulpicio Lines. Bago ito, ipinailalim din sa AJ ang welga ng mga manggagawa sa Philippine Rabbit Bus Lines, Central Azucarera de Tarlac, Lepanto Mining Corporation, Toyota Motors Corporation at iba pa. Ganito rin ang ginawa noong isang taon sa welga ng Tritan Bus Lines, SM, La Tondeña, San Miguel Corporation at Nestlé.

Mahaba at madugo ang rekord ng rehimen sa pagbubuwag ng mga nakatirik na welga upang ipatupad ang AJ. Ikinukubli ng gayong mga teknikalidad ang malawakang paglabag sa karapatang-tao at karapatang-union ng mga manggagawa. Isang matingkad na halimbawa ang welga ng Sulpicio Lines nitong nakaraang buwan. Estilong kumando na pinasok ng mga elemento ng AFP ang nakatirik na piketlayn at pinaputukan ang mga manggagawa upang buwagin ang welga. Dala ng labis na banta sa kanilang buhay, napilitan ang mga manggagawa at kanilang mga tagasuporta na lisanin ang piketlayn at sa kalaunan, ang kanilang laban.

Napakarami nang union ang nabuwag dahil sa AJ. Nasa kautusan mismo ng DOLE noong 2003 na tanggalin ang lahat ng mga lider-union at mga manggagawang patuloy na maggigiit sa kanilang



karapatang magwelga matapos ipataw ang AJ. Sa halos lahat ng mga kasong nabanggit sa itaas, awtomatikong sinipa ang mga lider-union at masusugid na tagasuporta ng welga.

Wala pang malaking kaso kung saan matagumpay na nabaligtad ng mga manggagawa ang isang AJ Order sa pamamagitan ng pagkwestyon ng ligalidad nito. Batbat ng kainutilan ang mismong proseso dahil sa DOLE din ihahapag ang kaso. Hindi kataka-taka lalupa't kahit saang korte, bihirang katigan ng batas ang mga manggagawa. At kahit sa mga kasong naipanalo na, walang ngipin ang batas upang mapagpasyang ipatupad ang anumang hatol laban sa mga kapitalista.

### **Ipaglaban ang karapatang magwelga**

Sa harap ng lansakang makapitalistang mga batas, isang malaking hamon sa mga mangga-


gawa na ipagtanggol ang kanilang karapatang magwelga. Partikular na mahalagang labanan ang paggamit ng taktikang AJ laban sa mga manggagawa. Ang paglaban dito ay makapagpapalakas sa buong kilusang manggagawa.

Sa maraming pagkakataon, hinaharap ng mga manggagawa ang AJ sa pamamagitan ng pagtutuloy ng welga. Kung tutuusin, walang mapagpipilian ang mga manggagawa—ang pagpapaubaya ng kanilang welga sa AJ at pagsunod sa kautusan ng DOLE ay katumbas na rin ng pagsuko ng kanilang laban.

Sa mga abanteng karanasan, nakapagpursige ang mga manggagawa at patuloy nilang naigigiit ang kanilang karapatang ituloy ang negosasyon sa pagitan ng union at maneydsment kahit naipataw na ang kautusan para sa AJ. Kabilang sa mga matagumpay na karanasan ang welga sa Philippine Rabbit Bus Lines, Lepanto Mining Corporation at Central Azucarera de Tarlac (CAT) noong nakaraang taon at maagang bahagi ng kasalukuyang taon. Sa mga kasong ito, buong tapang na sinuway ng mga manggagawa ang AJ at return to work order ng DOLE.

*Nagkakaisang prente:* Hinarap ng mga manggagawa ang bantang pagbuwag sa piketlayn sa pamamagitan ng pagpapalawak at ibayong pagpapalakas ng kanilang hanay. Malaking salik sa pagpapatuloy ng kanilang pakikibaka ang pulitikal at maging ang pisikal at materyal na suporta ng kanilang mga pamilya at ng iba-ibang sektor ng kanilang komunidad. Sa welga sa CAT, umabot sa 5,000 ang nasa piket-

layn kahit pa di aabot sa 1,000 lamang ang manggagawa roon. Sa welga ng Lepanto, buu-buong komunidad ang tumulong sa pagtatanggol at pagtataguyod ng welga. Sa kahuli-hulihan, nahirapang buwagin ng militar, pulis at mga bayarang *goons* ang mga piketlayn na pinatatag ng daan-daan kundi man libu-libong mamamayan.



**Pamamagitan ng ibang pwersa:** Sa ilang kaso, hindi kinilala ng mga manggagawa ang pamamagitan ng maka-kapitalistang DOLE. Dahil dito, nagsilbing tagapamagitan ang ilang upisyal ng lokal na guberno at iba pang mapagkakatiwalaang personalidad na maaasahang patas na magtitimbang sa interes ng dalawang panig. Sa kaso ng Lepanto, mismong ang meyor ng lokalidad at mga representante ng Bayan Muna Party ang umaktong tagapamagitan sa negosasyon ng mga manggagawa at ng maneydsment. Mayroon ding karanasan na nagpasa ang lokal na guberno ng resolyong sumusuporta sa mga nagwewelgang manggagawa at nananawagan para sa mabilis at mapagpasyang desisyon sa welga. Malaki rin ang maitutulong ng mga upisyal ng lokal na guberno sa pagrerenda ng karahasan laban sa piketlayn.

**Labanan sa propaganda:** Kasabay ng pagpapalakas ng piketlayn, mahalaga ang tuluy-tuloy na pagpapalaganap sa mga isyu ng mga manggagawa at paglalantad sa mga paglabag at pagpapahirap ng kapitalista. Sa nakaraan, nakatulong nang malaki ang pagdadala ng mga isyu sa radyo, dyaryo at telebisyon. Sa pamamagitan ng midya, naipalalaganap sa mas malawak na bilang ng mamamayan ang kalagayan ng mga manggagawa at nailalantad ang maka-kapitalistang katangian ng DOLE at mga batas sa paggawa. Nakalikha ito ng sapat na interes at simpatya para bahagyang mapaattras ang DOLE at napu-pwersa ang kapitalista na harapin ang mga iginigiit ng mga manggagawa.

Ang lahat ng ito ay magsisilbing panangga ng mga manggagawa sa karahasan ng rehimen. Ngunit higit sa lahat, susi sa isang matagumpay na welga ang katatagan at kahandaan ng unyon na sumabak dito sa kabila ng mga banta ng mga anti-manggagawang batas at galamay ng reaksiyunaryong estado.

AB

## Pag-ugat ng Partido sa kilusang manggagawa

**"T**aun-taon, lumalawak ang organisasyon ng Partido sa hanay ng mga manggagawa sa Metro Manila." Ito ang deklarasyon ng mga kasama sa National Trade Union Bureau ng Partido nang kapanayamin sila ng *AB* nitong Agosto.

Bawing-bawi na ang organisasyon ng Partido sa kilusang manggagawa sa Metro Manila matapos itong malagay sa bingit ng pagkalusaw bago ilunsad ang Ikalawang Dakilang Kilusang Pagwawasto. Noong 1998, dumoble ang bilang ng mga kasapi ng Partido.

Bagamat patuloy itong lumalawak at tumatatag, sadyang nakasagabal sa mas mabilis na paglakas ang iba't ibang salik. Kabilang dito ang mabilis na pagkabuwag ng mga unyon at mga yunit ng Partido sa mga pabrikang nagsara o malawakang nagtanggag ng mga manggagawa dala ng matinding krisis pang-ekonomya. "Kung gaano kabilis nakapagtatayo ng mga yunit ang Partido, ganuon din kabilis ang pagkabuwag ng mga ito sa mga pabrikang nagsasara o nagbabawas ng manggagawa," ayon sa mga kasama.

Kailangan sa gayon ang mas mabilis at mas masaklaw na kampanyang pagpapalawak upang malampasan ang bilis ng pagkalusaw ng mga yunit ng Partido sa kilusang paggawa. Naisasagawa ito sa pamamagitan ng tuluy-tuloy na rebolusyonisasyon ng mga unyon, paglulunsad ng mga pampulitika at pang-ekonomyang pakikibaka at pagsasagawa ng mga pag-aaral.

Ang mabilis na pagkalusaw ng mga yunit ay hindi nangangahulugan ng pagkalagas ng mga kasapi nito. "Kailangan lang mabilis na mailipat sa ibang yunit ng Partido ang mga manggagawang nawalan ng trabaho upang hindi sila tuluyang mawalan ng kolektiba. Marami sa kanila ang lumilipat ng pabrika o di kaya'y nagtatrabaho sa kanilang mga komunidad. Mayroon ding umuuwi sa prubinsya."

Maraming manggagawang kasapi ng Partido ang nagpapasyang magpatuloy kumilos sa kanayunan bilang mga Pulang mandirigma. Mayroon ding nagiging buong-panahong organisador ng mga manggagawa.

AB

# Kalagayan ng karapatang-tao sa bansa

**L**alo pang lalala ang kalagayan ng karapatang-tao sa bansa sa susunod na anim na taong panunungkulan ni Pres. Gloria Macapagal-Arroyo.

Batay sa pagtatasa ng KARAPATAN sa rekord ng rehimeng Arroyo mula 2001 hanggang unang bahagi ng taong kasalukuyan, nakikini-kinita nito na dadami pa ang mga paglabag sa mga karapatang-tao sa Pilipinas habang ipinatatupad ng gubyrno ang "matatag na republika" ni Arroyo at masugid nitong itinatangayod ang "gera laban sa terorismo" ng US.

Papalaki rin ang presensya at panghihimasok-militar ng US sa bansa. Matatandaang noong bago matapos ang "Balance Piston 04-03" sa Central Mindanao, kinumpirma ni Gen. Narciso Abaya, hepe ng AFP, na mayroon pang 18 pinagsanib na pagsasanay-militar ang US at ang Pilipinas ngayong




taon. Kaugnay nito, iigting pang lalo ang mga kampanya laban sa armadong rebolusyonaryong kilusang inilulunsad ng Bagong Hukbong Bayan sa pamumuno ng Partido Komunista ng Pilipinas at

ng Bangsamoro Islamic Armed Force sa pamumuno ng Moro Islamic Liberation Front.

Habang sinusupil ang mga kalayaang sibil ng malawak na mamamayan, lalo pang lalala ang pagsasamantala at pang-aapi sa uring anakpawis dahil sa walang tigil na pang-aatake ng pasistang estado sa ligal na demokratikong kilusan. Bunga nito, dadami pa ang bilang ng mga mamamayan na aarestuhin dahil sa mga paglabag pampulitika subalit sasampahan ng mga kasong kriminal. Samantala, patuloy pa ring ipinagkakait ng rehimen ang hustisyang isinisi-gaw ng mga biktima ng paglabag sa karapatang-tao, laluna noong panahon ng diktadurang Marcos. Malabo pa ring mabigyan ang mga ito ng danyos perwisyo kahit may desisyon na ang mga korte sa US at sa Pilipinas pabor sa 10,000 biktima ng paglabag sa karapatang-tao sa ilalim ng batas militar. **AB**

## Humahabang listahan ng mga paglabag sa karapatang-tao (2001-2004)



Pwersahang nagsilikas o nawalan ng tirahan: **113,211** katao  
 Nakaranas ng pagbabanta, harasment at pananakot: **26,093** katao  
 Nasiraan ng mga ari-arian: **12,067** katao  
 Nawalan ng kanilang ari-arian: **8,966** katao  
 Biktima ng iligal na mga paghahalughog: **5,786** katao  
 Biktima ng koersyon: **1,559** katao  
 Biktima ng *food at economic blockade*: **1,337** katao  
 Pisikal na inatake: **1,289** katao  
 Sapilitang tinipon sa mga "hamlet": **1,236** katao  
 Iligal na inaresto at ikinulong: **1,191** katao  
 Nirekonsentra o muling tinipon sa mga "hamlet": **896** katao  
 Arbitrario at iligal na idinitine: **676** katao  
 Biktima ng pananalbeyds/masaker: **319** katao  
 Biktima ng tortyur: **183** katao  
 Tinangkang patayin: **59** katao



## NDFP konsultant, iligal na ikinulong

BATAY sa listahan ng KARAPATAN noong Hunyo 2004, nakakulong ngayon sa iba't ibang bilanggu-an sa bansa ang 248 detenidong pulitikal. Kabilang dito si Eduardo Serrano, konsultant ng National Democratic Front of the Philippines (NDFP) na nakakulong ngayon sa Calapan City, Oriental Mindoro.

Si Serrano, kasama ang dalawang babae, ay dinukot ng mga operatiba ng Intelligence Service Group of the Philippine Army (ISG-PA) sa Lipa City, Batangas noong umaga ng Mayo 2. Pinaghihinalaan siyang si "Rogelio Villanueva" at si "Ka Macliing", isang mataas na lider umano ng rebolusyonaryong kilusan sa Mindoro. Siyam na araw siyang hindi pinahintulu-

tang umugnay sa kanyang pamilya at abugado. Kung saan-saang kampo at upisina siya hinanap ng kanyang mga kamag-anak, abugado at kasapi ng mga organisasyong nagtataguyod sa karapatang-tao. Natagpuan lamang siya ng isang upisyal ng Ecumenical Movement for Justice and Peace na nakabimbina sa isang kulungan sa Calapan City noong Mayo 12.

Ayon sa NDFP Negotiating Peace Panel, hindi maaaring arestuhin si Serrano dahil isa siya sa mga konsultant sa negosasyong pangkapayapaan at may proteksyon laban sa pang-aaresto at pagkakakulong alinsunod sa Joint Agreement on Safety and Immunity Guarantees (JASIG).



## 3 kasapi ng BM, dinukot

TATLONG kasapi ng Bayan Muna (BM) ang dinukot ng mga elemento ng Intelligence Service of the AFP sa Sampaloc, Maynila nitong Agosto 18. Tumatangging magbigay ng anumang impormasyon ang mga pulis at militar tungkol sa sinapit ng tatlong kasapi ng BM.

Samantala, sa Bohol, iligal na inaresto ang mga magsasakang sina Hermosila Villamor, 30, at Roldan Emance, 32 noong umaga ng Hulyo 26 sa Barangay Kalbaryo, Lila. Pinaratangan silang mga kasapi ng BHB. Hinuli sila ng mga pulis matapos nitong makaengkwen-tro ang isang yunit ng BHB. Nakakulong sila ngayon sa Camp Dagohoy sa Tagbilaran City.

## ST, "killing fields" para sa mga aktibista

BINANSAGANG pinakamapanganib na lugar ang rehiyon ng Southern Tagalog para sa mga progresibong aktibista bunsod ng pagkakapaslang nitong Agosto 27 sa City of Sta. Rosa, Laguna kay Melita Trinidad Carvajal, 50, coordinator ng Gabriela Women's Party.

Naghihintay ng masasakyang traysikel si Carvajal sa tapat ng kanyang bahay nang lapitan at pagbabarilin siya ng dalawang tao. Namatay siya bago pa man makarating sa ospital.

Umaabot na ngayon sa 80 ang mga aktibistang biktima ng pamamaslang dito sa tatlong taong panunungkulan ni Arroyo.



## Mga pulis at militar, inireklamo sa Bulacan

ILIGAL na nanghalughog, nagnakaw at walang pakundangang nagpaputok ang mga elemento ng Philippine Army at 306th Provincial Mobile Group na pinamunuan ni Chief Insp. Alex Sitin sa dalawang barangay sa Bulacan.

Noong gabi ng Mayo 27, dumating sa Barangay Sta. Lucia ang mga tropa. Agad nilang kinordon, pinaputukan at pinasok ang bahay ni Alexander Tigas, na wala noon sa kanyang bahay. Ninakawan nila si Tigas ng pera at mga gamit. Pagkatapos nito, dalawang bahay pa ang nilooban ng mga pulis.

Noong Mayo 30, pinasok ng 10 sundalo ng Philippine Army bandang ala-una hanggang alas-dos ng mada-ling araw ang bahay ni Marcelo Miras sa Sityo Coral, Barangay Matictic upang hanapin diumano ang isang nagngangalang "Rico". Umalis ang mga sundalo na tangay ang gulok ni Miras.

## Pangungulimbat ng CAFGU sa Maguindanao

KINULIMBAT ng mga elemento ng CAFGU ang ari-arian sa mga barangay na inabandona ng mga taumbaryo sa Maguindanao sa kainitan ng mga labanan sa pagitan ng mga yunit ng Moro Islamic Liberation Front at Philippine Army mula Agosto 28-29.

Ayon sa Joint GRP-MILF Coordinating Committee on the Cessation of Hostilities (CCCH), mga elemento ng CAFGU ang nagnakaw ng mahahala-gang gamit at rekurso ng barangay. Ninakaw din ng mga CAFGU ang mga kalabaw, iba pang alagang hayop, pagkain at sarisaring gamit.

Aabot sa 2,860 pamilya (14,215 katao) mula sa Linantangan, Dalapdap, Pimbalakan, Bagumbong, Tukanalipao, Dugengen, Liab, Dabenayon, Dasikil, Pagatin at Puseo ng Mamasapano at Saudi Ampatuan, Maguindanao ang lumikas.





### 63rd IB, pinalalayas sa Basey, Samar

PINALALAYAS ngayon sa bayan ng Basey, Samar ang mga abusadong tropa ng 63rd IB. Sa nilagdaang petisyon noong Agosto 23 ng mahigit 200 katao, iginiit nila ang pagpapatigil ng mga operasyong militar at pagpapaalis sa lugar ng nasabing tropa. Isinumite nila ito nang makipagpulong sila sa Municipal Peace and Order Council (MPOC). Dinaluhan din ito ni Mayor Vicente Labuac ng Basey at mga konsehal nito, ni Gen. Anastacio Salud, hepe ng 801st Bde at Col. Manuel Ramos, hepe ng 46th IB.

Naganap ang pulong ng MPOC bunsod ng mga reklamo na mga pang-aabuso ng mga militar sa taumbaryo. Nagsampa rin ng kaso ang mga taumbaryo sa Commission on Human Rights-Eastern Visayas.

Nang hindi inaksyunan ang kanilang mga reklamo, naglunsad ang Samahan han Gudti nga Parag-uma-Sinirangan Bisayas at Promotion of Church People's Response-Tacloban ng isang fact-finding mission sa kanayunan ng Basey noong Agosto 20. Sinalihan din ito ng mga konsehal ng Basey. Nakumpirma rito ang mga kaso ng pang-aabuso ng 46th IB sa mga barangay ng Villa Aurora, Bulao at Cogon tulad ng pananakot sa mga bata, paninira ng mga pananim at iligal na paghahalughog ng mga bahay mula Agosto 7-17.

### 2 lider magsasaka hinuli sa Bohol

ILIGAL na inaresto at diniteyn ng mga elemento ng PNP at 17th Special Forces Company ng Philippine Army ang dalawang lider magsasaka sa Bohol noong Agosto 13.

Ayon sa KARAPATAN-Central Visayas, bandang ala-5:30 ng umaga ay hinarang sina Felipeneri Bejasa at Ireneo Uchang sa tsekpoynt na itinayo ng 17th Special Forces Company sa Barangay Rizal, Catigbian. Nagmula pa sila sa Tagbilaran City at patungong bayan ng Trinidad para dumalo sa isang pulong ng mga kasapi ng Hiniusang Makinasodnong Mag-uuma sa Trinidad, na kasapi ng Hugpong sa mga Mag-uumang Bol-anon (HUMABOL). Si Bejasa ang pangalawang pangulo ng HUMABOL at si Uchang naman ay organisador ng partidong Anakpawis.

Nang halungkatin ng militar ang kanilang mga bakpak, kinumpiska ang mga dokumento ng Comprehensive Agreement on Respect for Human Rights and International Humanitarian Law (CARHRIHL) na nilagdaan ng GRP at NDFP noong Agosto 1998.

Sa paratang na "subersibong dokumento" ang mga kopya ng CARHRIHL, dinala at ikinulong sina Bejasa at Uchang sa himpilan ng Catigbian Police Office. Bandang 3:30 ng hapon, pinakawalan sila dahil walang makitang anumang ebidensya ang Bohol Provincial Police Office para ibimbin pa sila.

### Buntis na ginang patay, asawa, 3 anak sugatan sa istraping ng militar

BANDANG alas-6 ng umaga noong Agosto 8 sa Barangay Uno, Catubig, Northern Samar, walang pakundangang pinaulanan ng bala ang bahay ng pamilyang Conge. Kaagad na namatay si Mely Conge, 27, dahil sa tinamong 17 bala sa katawan. Apat na buwan siyang buntis.

Malubhang nasugatan ang kanyang asawang si Sonny, Sr, 27, at tatlo nilang mga anak—Sonny, Jr, 10, Sammy, 8 at Gina, 6. Dinala sila ng kanilang mga kapitbahay sa Northern Samar Provincial Hospital at kakailanganing ipadala sa Metro Manila dahil sa kalubhaan ng kanilang tinamong mga sugat.


Apat na iba't ibang bersyon ng madugong insidenteng ito ang ipinalabas upang makaiwas sa

kanilang kriminal na responsibilidad ang armadong pwersa ng guberno. Isang araw, makaraan ang insidente, kinilala ang mga biktima na mga gerilya ng Bagong Hukbong Bayan (BHB), ayon sa binasang *text* na ipinadala ng AFP sa istasyon ng dzRH sa Maynila noong Agosto 9. Nang kapanayamin ng mga reporter ng lokal na midya si Col. Manuel Usi, kumander ng 63rd IB, sinabi niyang nagkakanlong ng mga gerilya ng BHB ang pamilyang Conge. Sinabi naman ng upisyal na ito noong Agosto 10 na mga Pulang mandirigma ang may kinalaman sa madugong insidente. Sa pangatlong araw, inilabas ang pang-apat

na bersyon: isang armadong grupo na hindi kilala ng militar ang siyang may kagagawan umano sa pag-iistraping sa maralitang pamilya.

Sa testimonya ni Sonny Conge, Sr. tinukoy niya na isa sa mga bumaril ay ang kanilang kapitbahay na elemento ng CAFGU, si Romy Acerbon.

Mariing binatikos ng KATUNGOD-Northern Samar at lokal na midya ang paghihigpit ng mga upisyal ng 63rd IB at 803rd Bde upang hindi makapanayam ang mga myembro ng pamilya. Isang iskwad ng Scout Rangers ang nakabantay sa mga pasyente sa Northern Samar Provincial Hospital.



# Lumalalang panggigipit sa midya

Noong Agosto 16, di bababa sa 200 mamamahayag mula sa iba't ibang bahagi ng Pilipinas ang nagrali sa pambansang himpilan ng pulisya sa Camp Crame upang batikusin ang kainutulan ng Philippine National Police (PNP) na lutasin ang napakarami nang kaso ng pamamaslang sa mga mamamahayag sa Pilipinas.

Bukod sa National Union of Journalists in the Philippines (NUJP) na nanguna sa kilos-protesta, dumalo ang 10 iba pang organisasyon ng mga mamamahayag. Naglunsad rin ng mga pagkilos noong araw ding iyon ang mga mamamahayag sa mga lunsod ng Bacolod, Gen. Santos, Iloilo, Cebu at Pagadian at sa prubinsya ng Antique.

Nagpasya na ang mga mamamahayag na igiit ang paggagawad ng katarungan sa mga namatay na peryodista at broadcaster dahil sa nakaaalarma nang bilang ng mga pinapatay na tagamidya. Pumapangalawa na ngayon ang Pilipinas sa mundo sa bilang ng mga mamamahayag na pinaslang habang gumagampan ng kanilang trabaho. Tanging ang Iraq, na kasalukuyang sinasalanta ng gera, ang bansang nakauungos pa sa Pilipinas sa bagay na ito.

Mula nang ibagsak ang diktadurang Marcos noong Pebrero 1986, di bababa sa 55 mamamahayag na ang pinapatay sa bansa, ayon sa NUJP. Ayon naman sa hiwalay na listahan ng *Bulatlat*, isang pahayagan sa *internet*, aabot na sa 78 mamamahayag ang napapatay mula noon. Kung isasama ang mga pinatay noong pana-

hon ng batas militar, 110 na lahat-lahat ang mamamahayag na biktima ng pamamaslang. Dalawampu rito ay pinaslang sa ilalim ng rehimeng Arroyo.

Ngayong taon, anim nang mamamahayag ang pinapa-

tay, apat sa kanila sa buwan lamang ng Agosto. Halos kapantay na ito ng bilang ng mga tagamidya na pinatay sa buong 2003.

Lahat ng mga pinaslang na mamamahayag ay kilala sa pagbatikos sa korapsyon at sa pagkakasangkot ng pulis, militar, matataas na upisyal ng gubyrno at malalaking negosyante sa iba't ibang gawaing kriminal.

Si Sonny Alcantara, *news presenter* ng City TV sa San Pablo, Laguna ay pinagbabaril noong Agosto 2002 pagkatapos niyang batikusin ang isang lokal na upisyal ng syudad. Si Rico Ramirez, *reporter, cameraman* at *spinner* ng DXSF sa San Francisco, Agusan del Sur ay pinatay noong Agosto 2003 dahil sa kanyang matitinding batikos laban sa iligal na droga at iba pang krimen sa kanilang lugar. Si Noel Villarante, isa pang komentarista sa DZJV sa Laguna, ay pinaslang noon ding buwang iyon dahil din sa kanyang pagbatikos sa mga anomalya. Si Bonifacio Gregorio, kolumnista ng *Dyaryo Banat* sa Tarlac, ay pinatay noong Hulyo 2003 dahil sa matindi

niyang pagbatikos sa korapsyon sa gubyrno, iligal na droga at iligal na pagpapalit-gamit ng mga lupa ng mga magsasaka para gawing komersyal na *memorial park*.


Pag-aari ng meyor ng La Paz, Tarlac ang naturang *memorial park*. Noong Abril 2003, pinatay sa Camalig, Albay ang progresibo at matapang na broadcaster ng DZGB na si John Villanueva Jr.

Ngayong Agosto lamang, pinatay sa Bauan, Batangas si Arnel Manalo, korespondent ng dyaryong *Bulgar* at ng DZRH matapos niyang ilantad ang panig ng kaaway ng isang makapangyarihang negosyante sa prubinsya.

Bukod pa ito sa mga kaso ng bigong pagpatay. Sugatan si Cirse "Choy" Torralba, broadcaster ng Angel Radio sa Cebu City matapos siyang ambusin nitong Hunyo 8. Nalakigtas din si Modesto Gutierrez, komentarista sa DWSI sa Santiago City, matapos siyang pasabugan ng granada nitong Pebrero 13.

Sa harap ng lahat ng ito, walang interes ang rehimeng Arroyo na pawiin ang lumalalang panggigipit sa midya. Bagkus, mismong si Mike Arroyo, asawa ng presidente, ay kabilang sa mga makapangyarihang taong nagsisikap na busalan ang mga mamamahayag.

Sinampahan nitong Agosto ng kasong libelo ni Mike Arroyo sina William Esposo, kolumnista ng *INQ7.net* at sina Amado Macasaet at Rosario Galang ng pahayagang *Malaya* dahil sa paglalantad nila sa mga anomalyang kinasasangkutan niya kaugnay ng kanyang mga



“grupong pangkawanggawa.” Bago ito, apat pang peryodista ang sinampahan din ni Mike Arroyo ng libelo noong Hunyo nang isangkot siya ng mga ito sa mga kaso ng korapsyon at sa pandaraya sa eleksyon noong Mayo.

Bukod sa mga pinapatay na mga mamamahayag, di hamak na mas marami pang tagamidya ang biktima ng harasment, pananakot, pambubugbog at iba pang uri ng panggigipit at paglabag sa karapatang-tao. Karamihan sa mga kaso ay hindi na naiulat o nalalantad sa publiko.

Nitong Agosto, binantaan ang buhay at mahigpit na minanmanan ng mga di kilalang lalaki ang isang kasamahan ni Arnel Manalo sa midya at napilitan ding magtago nang ilang araw ang isa pa niyang katrabaho nang ipahiwatig nila sa isang interbyu na alam nila kung sino ang nagpapatay kay Manalo.

Mula Pebrero hanggang Hunyo 2004, di bababa sa lima pang kaso ng panggigipit sa midya ang naitala ng NUJP:

Pinagbubugbog, isinailalim sa interogasyon at pinagbantaang papatayin nitong Mayo 31 ng mga elemento ng 20th Special Forces si Melvin Mamis, *cameraman* ng Southern Tagalog Exposure, nang kunan niya ng bidyo ang isang *fact-finding mission* sa Rosario, Batangas.

Isa ring mamamahayag sa Ozamiz City ang kinasuhan ng libelo dahil lamang sa pagkokober niya sa isang kilos-protesta.

Paulit-ulit na ipinasara ni Mayor Caesar Dy ng Cauayan City ang Bombo Radyo-Isabela dahil sa pambabatikos nito sa korapsyon at karahasan ng pamilyang Dy sa prubinsya.


Sinuspindi si Rolando Bartolome, brodkaster ng DWBL, dahil sa

mga batikos niya laban kay Gloria Arroyo.

Sapilitang pinaalis sa ere nitong Hunyo 23 ng militar ang Radyo Anakpawis, lingguhang programa ng Samahang Magbubukid sa Timog Katagalugan sa DZRB sa Batangas City, dahil Bagong Hukbong Bayan diumano ang nagpapatakbo sa programa. Binantaan din ng militar at pulis na rerey-din nila ang istasyon kung hindi ititigil ang programa.

Bago ito, noong Oktubre hanggang Nobyembre 2002, anim na kaso ng pagdukot at panghahas ng pulis, militar at paramilitar sa mga tagamidya ang naitala ng NUJP. Pinakamatingkad rito ang harasment ni Col. Jovito Palparan kay Edu Paringit, isang *cameraman* ng TVnet, isang lokal na istasyon ng telebisyon sa Calapan City, dahil lamang sa pagkober niya sa marahas na demolisyon ng mga kabahayan sa lunsod.

Noong taon ding iyon, tatlong iba pa ang dinukot at marami pa ang pinagbantaan dahil lamang sa paglalabas ng mga ulat laban sa militar at sa rehimeng Arroyo.



Ang tanging tugon ng PNP sa harap nito ay ang “payo” ni PNP Dir. Gen. Hermogenes Ebdane sa mga tagamidya na manahimik na lamang para huwag silang maging target ng karahasan, at ang nauna pang payo ng PNP sa mga mamamahayag na mag-armas na lamang para maipagtaggol nila ang kanilang mga sarili. Nagkibit-balikat din si Gen. Angelo Reyes, kalihim ng Dept. of Interior and

Local Government na nangangasiwa sa PNP, nang sabihin niyang wala siyang nakikitang anumang kapuna-punang tunguhin sa bilang ng mga pinapatay na mga tagamidya.

Walang dapat ipagtaka sa ganitong paghuhugas-kamay ng PNP. Sa maraming pagkakataon ay mga elemento mismo ng pulisya ang sangkot sa pagpatay o panggigipit sa mga tagamidya. Pulis ang pumatay noong Mayo 2002 kay Edgar Damalerio, isang reporter ng *Zamboanga Scribe* at *Mindanao Gold Star* at komentarista sa DXKP sa Pagadian City. Sa kabila ng pagkatukoy at pagkaaresto na kay PO1 Guillermo Wapile, pinatakas siya ng mga kapwa niya pulis. Dalawang taon nang hindi ginagalaw si Wapile kahit pakalat-kalat lamang ito sa Pagadian at iba pang lugar sa prubinsya. Katunayan ay naging badigard pa siya ng isang pulitiko noong nakaraang eleksyon.

Nitong huli, tinanggalan na ng proteksyon ang pamilya ni Damalerio at iba pang testigo kaya napilitan na rin silang magtago.

Ang patuloy na pagdami ng mga kaso ng pamamaslang at panggigipit sa mga tagamidya at ang patuloy ding kawalang-aksyon ng reaksyunaryong guberno rito ay patunay lamang na pabor sa interes ng naghaharing uri ang ganitong tunguhin. Habang may nakaambang panganib sa buhay at seguridad ng mga mamamahayag, dagdag itong sandata ng naghaharing uri para supilin ang pagbubunyag ng mga anomalyang kinasasangkutan nila at iba pa nilang kriminal at anti-mamamayang gawain at pangalagaan ang kanilang interes. **AB**

## Mga taktikal na opensiba, inilunsad sa Cordillera at Mindanao

**Reyd sa Kalinga.** Sinamantala ng mga Pulang mandirigma ang malakas na ulan upang salakayin ang detatsment ng Philippine Army bandang alas-6 ng umaga ng Agosto 25 sa Barangay Balantoy, Balbalan. Isang elemento ng CAFGU ang napatay at lima pa ang nasugatan.

Rumesponde ang pinagsanib na pangkat ng Philippine Army at pulis ngunit natambangan sila ng

*blocking force* ng BHB sa Sityo Butod. Nasugatan ang tatlong pulis, kabilang ang *officer in charge* ng Balbalan *police station*.

**Mga operasyong disarm sa Mindanao.** Sinalakay ng pitong Pulang mandirigma ang *outpost* ng gwardya ng MD Rio Vesta Agri Venture Plantation sa Barangay Pangi, Maco, Compostela Valley noong Agosto 25. Dinisarmahan nila ang tatlong gwardya ng isang

de-sabog, dalawang kalibre .38 rebolber at isang granada at isang radyong pangkomunikasyon.

Makalipas ang dalawang araw, kinumpiska ang kalibre .45 ng nagdidiskong pulis sa Mati, Davao Oriental noong gabi ng Agosto 27. Nasa isang sayawan si P01 Ruel Carrido nang dumating ang isang pangkat ng mga Pulang mandirigma.



## Nominasyon ni Bush, sinalubong ng mga protesta

BINAYO ng araw-araw na protesta ang pambansang kumbensyon ng Republican Party na ginanap sa New York City mula Agosto 29-Setyembre 3. Sa kumbensyong ito pormal na ipinroklama si George W. Bush bilang upisyal na kandidato ng Republican Party sa eleksyong presidensyal ng US sa Nobyembre 2. Habang tinatanggap ni Bush ang kanyang nominasyon, umalingawngaw ang mga sigaw sa lansangan na: *No more years!* (Huwa nang palawigin!)

Pinamunuan ng United for Peace and Justice ang daan-daang libong tagaprotesta. Tutol ang grupong ito sa inilulunsad na gerang agresyon ng US sa Afghanistan at Iraq. Sa kabuuan, umabot ang mobilisasyon sa 500,000 batay sa konserbatibong tantya sa mga aksyong masa na nagsimula noong Agosto 28 at natapos nitong Setyembre 3.

Noong Agosto 28, sinimulan ng may 15,000 aktibista ang rali sa pagbatikos sa anti-aborsyong patakaran ni Bush. Kasabay sa pagbubukas ng kumbensyon, umabot sa mahigit dalawang milya (3.2 kilometro) ang haba ng mga nagmartsa noong Agosto 29. Pinangunahan ito nina Michael

Moore, ang kilalang direktor ng pelikulang "Fahrenheit 9-11" at Atty. Jesse Jackson ng Democratic Party. Inabot ng dalawang oras ang pagmamartsa ng 400,000 katao. Kabilang sa nagmartsa ang 1,000 katao na pasan ang mga nakabalot sa bandilang kabaong bilang simbolo ng mga namamatay na sundalong Amerikano sa Iraq. Ayon sa ipinalabas na datos ng Pentagon, 975 ang namatay at 6,916 ang mga sugatang sundalo ng US sa Iraq mula noong Marso 2003.

Noong Setyembre 1 naman ay naglunsad ang mga demonstrador ng tatlong milyang haba (4.8 kilometro) ng simbolikong pila ng mga walang hanapbuhay. Ayon sa mga organisador, tatlong milyong trabaho ang nawala mula noong taong 2000, na pinalala pa noong 2003 nang maglunsad ng gera ang gubyernong Bush laban sa Iraq. Mga 45 milyong Amerikano naman ang walang "health care."

Binatikos din nila ang kawalan ng pondo ng gubyerno para sa kagalingang panlipunan tulad ng para sa pensyon, tulong sa mga pasyente na may AIDS at iba pa. Pinanawagan din nila ang pagsuporta sa pakikibaka ng mga mamamayang Palestino; mga karapatan



ng mga imigrant at mga bakla; at pagpapatigil sa kaguluhan sa Sudan.

Sa desperasyong pigilin ang mga lehitimong protesta, nagpakat ang gubyerno ng 10,000 lokal na pulis, bukod pa sa mga pangkat ng SWAT, pederal at pang-estadong pwersang panseguridad at "attack dogs." Lampas 1,800 katao ang ilegal na inaresto at ikinulong. Nilampasan nito ang rekord na naitala noong 1968 Chicago Convention ng Republican Party kung saan 589 ang inarestong demonstrador.